


洋学文庫
文庫 8
D 288
2



文庫 8
D 288
2

中西紀事卷之三

互市檔案

江上蹇突

國朝康熙二十二年滅鄭氏臺灣平越二年疆臣請開海禁報可於是設權關四在於粵東之澳門福建之漳州府浙江之寧波府江南之雲臺山時荷蘭以助攻鄭氏有功首請通市大西洋素稱饒沃又其人勤於貿易多操海舶為生涯自荷蘭得請則明以前之未通中國者皆爭趨之英吉利者大西洋之強國也自明以來拓地漸廣開通市埠及於東南洋當康熙之初即謀通商於澳門以海禁未開而止九年鄭成功之子經方踞臺灣英商來往於廈門臺灣等處凡數歲鄭減其稅而羈縻之藉以控制荷蘭未幾耿鄭交兵藩臣內亂

中西紀事 卷三



39- 7725

010190619996

朝廷議先定沿海邊界防外洋之助鄭爲患者於是英人以華商交易不便復去之及臺灣隸入

大清版圖英人又疑新拓之區稅則必重乃舍閩赴粵東又時來往於浙之舟山寧波等處而其時英吉利之名不著但知其爲紅毛之番族而已五十六年總兵陳昂始奏稱粵東紅毛有英圭黎諸國最爲奸宄蓋其時通市於廣州澳門等處屢以粵關索費太重糾洋商合詞爭之雍正之初又議增收禮物銀兩乃於七年合詞控於大府得稍稍裁減未幾官吏又增出口之稅於是英人始有移市入浙之志矣初浙之海關設於寧波舟山尙未置縣商船出入寧波往還百數十里水急礁多往往回帆徑去迨定海旣設監督張聖詔始請移海關於定海部議從之乃於定海城外道頭街之西特建紅毛館一

區以爲番舶來往之逆旅自是浙之定海商船日多英商以粵中不便數來往舟山見今昔情形之異乃定計爭之乾隆二十年英舟泊定海港有總商喀喇生通事洪任輝請於浙之寧紹台道願在定海納餉許運貨至甯波府閩粵兩督聞之以其利浙稅之輕而致關課之絀也二十二年閩粵總督上言浙關正稅請視粵關則例酌加增一倍部議從之奉

旨洋船向收廣東口由粵海關稽察徵稅浙省寧波不過偶一至今奸牙勾結漁利至甯波者甚多番舶雲集日久留住又成一粵之澳門矣今更定章程視粵稍重俾洋商無所利而不來以示限制意初不在增稅也未幾部臣復議外洋不准赴浙貿易定制歸併粵東一港每年夏秋之交由虎門入口是時方嚴絲餉綢緞出洋之禁英吉

利雖時時違制潛赴寧波無所得仍遵新制在粵通市粵中初設洋商通事洋行據爲籠斷之利誅求不已串通官吏規費益增於是英商洪任輝等仍赴浙請在寧波開港而浙撫已奉新令悉毀英商旅廨聞其舟泊舟山遂發令驅逐斷其岸上接濟之食物洪任輝憤甚乃由舟山泛海直抵天津仍乞通市寧波並許粵關積年規弊奉旨詰責飭將洪任輝由旱道押赴廣東遂於二十四年七月奉命著福州將軍以欽差赴粵按驗苛勒有狀將監督家人問罪又因洪任輝不應違制擅赴天津押往澳門圈禁三年始釋之自此諸番通市粵中奉法惟謹乃事閱三十年弊端復起向之裁改歸公者又增其費而加重焉各洋商皆以爲不便而懲洪任輝之往事未敢訟言英國王雅治乃與其臣下謀議以

純廟八旬萬壽入貢天津乘間言之五十八年英國王遣其使臣馬

甘尼

一作馬
憂爾尼

由海道赴天津入貢始通中國也時

上以遠人嚮慕誠款可嘉特命理藩院導其入覲嗣使臣以其國王表文進仍請在浙開港並通市天津又欲援俄羅斯往例遣人寄住京師上以寧波天津無通事洋行交易未便且俄羅斯自立恰克圖後久不在京寄寓所請給舟山海島並廣東附近省城地華洋參錯斷不可行因特頒敕諭前後二道逐款指駁示以中外之防使臣乃不敢言比其反也

上遣重臣伴送由內地經歷直隸山東江蘇安徽浙江福建至粵東放洋回國貢舟過寧波請便道市茶絲出洋許之馬甘尼回國國王

開讀敕諭自知所請與中國體制不符事遂寢然雖絕意於舟山猶思逞志於澳門又其時英人方與佛郎西構兵懼其播聞於中國因敕諭中有許其再來款貢之語乃於六十年復具書幣由粵之大班轉呈粵撫代爲陳奏並述其昔年曾帶兵船至的密地方助

天朝大將軍蓋福康安征廓爾喀時事也粵撫譯其文以其詞極恭順

上亦優答之然其來往澳中旣忌葡人又防佛郎西展轉包藏遂有嘉慶七年十三年之事

澳門者各洋貿易來往之所聚而葡萄牙實主之乾隆間定制並歸粵東暫泊黃埔交市事竣仍回澳門住冬轉向葡人賃屋棲止限則驅之歸國又葡人但輪船鈔不似諸番船貨並稅英人自通市於粵設四班公司經理貿易欲得中國一島之地如新嘉坡麻六甲者以爲逆旅其形便無過澳門而爲葡萄牙所先已積不能平又見澳中官吏與之爲援尤陰忌之迨乾隆之末入貢要求請令澳門寄住之洋商得出入自便意欲效葡人事例得以輕賦自立馬頭而未敢訟言上亦陰相制馭故勅諭中但令其循向來澳門貿易之常例而英人窺之不已嘉慶七年英有兵船六泊雞頸洋託言佛郎西欲侵澳門故遣兵來戍實藉詞窺澳也葡萄牙人亞覺之乃告於大府飭洋商宣諭令其釋兵回國遂以是年六月去去之日遣人陳謝仍以佛郎西爲言時粵中大吏以其在澳未久又不煩兵力遂秘之而其事已寢聞於

上迨十年英國主復具方物遣使臣附商船來粵譯其表文則以方

與佛郎西構釁恐其播謠於中國以間我蓋自說其七年之役也是時英商每有貨船輒以兵船防護之又恐中國疑其復有澳門之事值閩粵之間海氛不靖乃託以協勦海盜游奕內洋

上見其表文中有欲爲中國効力之語諭新任總督那彥成至粵整飭戎備其護貨之兵船亦令申畫疆界毋使侵踰越三年而澳中釁復起十三年英將有度路利者

一作圖禮

自安南敗歸以其餘艘抵澳亦

聲稱佛郎西取小呂宋將順道襲澳門葡人知其詐而粵之大班有喇佛者以七年之役爲澳夷所間挫衄而歸欲以此時兵力唆令度路利占澳門爲補牢計大府聞之卽飭諭洋商傳諭大班令遣兵船回且告曰澳門非葡萄亞所有乃我

大清土地也佛焉敢侵軼我且邊寇有警中國自能禦之毋勞戍師致吾民驚擾度路利聞之怒乃率兵登岸占踞市樓澳門之民驚恐罷市時兩廣總督吳熊光粵撫孫玉庭聞變乃援照違抗封艙之案調兵守禦度路利遂率兵船三徑駛入虎門進泊黃埔又自黃埔乘杉船數十艘直抵會城入館寄寓揚言將劫十三洋行以修怨度既下令兵船爭趨之乃有碣石鎮總兵黃飛鵬以師船橫截省河飛礮擊斃西兵一傷者三始懼而退然其踞洋館如故也時大班索還累年商欠又以封艙停市請退所買之茶而償其值虛聲恫喝勢益張適英吉利本國有船主來聞封艙之事懟大班曰犯中國而罷市雖得澳門猶石田也先時洋船率以七月抵粵停泊黃埔換貨不過兩月交冬卽回帆去至是泊港外數月貨無起日各商亦怨謗沸騰大班喇佛乃言於度路利責葡人納賂以番洋六十萬犒師英之兵

船始具狀歸誠請照舊通市維時方奉勦辦之

諭旨各路官兵雲集者二千六百名而督撫意在弭釁遂許以兵退開艚於是度路利以冬月起旋出洋蓋已有成約也

上以吳熙光辦理遲緩又不親蒞澳門耀示兵威雖開艚在西兵既退之後而許之在先

嚴旨切責旋飭新任督臣馳赴澳門查訪盡得其情因劾熊光示弱畏蕙狀遂與巡撫孫玉庭俱論罷遣有差是役也英人覬覦濠鏡自謂與天朝無纖芥之嫌而度路利稱兵入省實由封艚激成且其自安南來亦非該國王本意大班喇佛教唆其事聞於英國國王遂革大班之職喇佛不敢歸復回粵粵中人以前事銜之驅逐回澳數年以憂死

自公司局之設也大班來粵者率寄寓洋行行人事之惟謹然所以賸削之者無所不至又與關吏因緣爲奸課稅既增則規費抽用亦增有取之十倍二十倍於前者十五年英之大班稟控粵撫謂各洋貿易資本皆自國帑借領不堪虧折請酌量裁減以利遠人粵撫韓對檄飭布政司核議久之竟寢不行當初行用時每兩奏抽三分以作洋行辛費繼而軍需出其中貢價出其中各商攤還西債亦出其中遂分爲內用外用名目於是各洋利薄怨生屢思藉貢輸忱以希恩澤二十一年英國王復遣使臣分入粵東京師其至粵者曰加拉威禮方至粵輒爭謁見儀注以舊制貢使見制府將軍皆免冠俯伏大吏坐堂皇受之拉威禮不可時粵督蔣攸銛方入覲攝事者爲董教增許免拜伏禮僅免冠致敬大府亦離席立受之是時英之正貢

使羅爾美副貢使馬禮遜已乘貢舟達天津夏六月

上遣大臣戶部尚書和世泰等賜宴使臣於天津有司諭以謝宴時應行跪叩禮不可將入都又告以乾隆二十八年該國使臣入覲儀注不答時

上在圓明園尚書和世泰等先期導使臣自通州起行一晝夜馳至御園車馬困頓而使臣衣裝輻重皆落後蓋惡其不肯循跪叩儀注欲以計尼之時使臣表未齋禮服不備倉皇失措遂以病辭而睿廟已詰朝御殿傳呼和世泰始以正使病聞復

召見副使又不至

上怒其無禮命卻其貢不納即日遣理藩院押回通州瀕行仍令援乾隆五十八年例由內地行走是役也使臣失禮實以衣車未至之故

上詢之廷臣始知當日理藩院迎接不如儀乃譴和世泰酌收貢物數事仍頒

敕諭賜其國王珍玩以答遠忱驛交粵督蔣攸銛令慰遣之然英使本欲以粵東增規費事入告竟不得達怏怏而去大班之在粵也初寓洋行繼則立公局久留粵中已不復循回澳住冬之例道光之初粵城外不戒於火民居多斥爲平陸英商欲廣其公局乃藉修葺爲名以次侵占拓地數里而其地當對河居民渡口居民欲返其故地不得乃控於大府時大學士李鴻賓任兩廣總督實不理粵人謂其受洋商賄乃乘其入覲之間控於粵撫朱桂楨朱在粵素有威望洋商憚之間控震怒立鎖拏通事下獄洋行懼誤開艙事跪求免究乃

親督拆毀平之英商之桀黠者果以八事入稟要挾停止開船相持者半年仍以孟加刺新到之船主居間調停事遂解此道光七八年間事也初洋商在粵通市定制不得攜帶家屬自大班公司之設出入自便遂於八年秋有大班某挈一洋婦寄寓粵城而其時十三洋行中有東裕行司事謝某爲置肩輿出入乘坐久之夜郎自大翻不許行中人乘轎入館大府廉得之立拏謝某究治瘦死獄中大班聞其事輒架大礮於洋館外設兵自衛大府慮激變乃進通事蔡剛以理曉諭令撤去兵礮並速遣洋婦回國於是洋行具稟託以大班患病需人乳爲引俟稍愈當即遣之大府據稟完案不復根追洋婦卒逗留不遣數年之後義律來粵竟以挈眷爲援例之常而邊釁亦因之起矣

義律者英公司散後續到之大班也英人自開港於粵惟公司船許赴粵中貿易此外散商不聽擅自出入著之令甲以二百年爲限其公司大班亦定以三十年一瓜代所有貿易資本悉領自國庫中歲收其息嗣因公司乾沒庫帑不能償又於十三年後復請展限限滿則虧折如故英國主見其黨與日多駸駸乎不可制亟思設法解散之值道光十年後屈指例限將屆

大清通商二百年之期教西人紀載以解散公司爲十四年事然律勞卑以是以前二百年者亦年來粵爲盧制使所逐則解散必在十年以後十四年舉其大數而已遂乘機裁革前例解散公司之局聽散商各自牟利

英之富商皆以爲便而中國素惡公司橫甚不如散商之易於制馭惟十三洋行與公司交通既久狼狽爲奸反以爲不便乃託言公司散後統領無人因有再著大班來粵之請十四年盧坤調任兩廣總

督奏請

勅令洋商寄信回國仍援前例派公司大班來粵管理貿易英國主
得信即遣領事一人名律勞卑者以是年秋至澳由澳來粵大吏以
其未經通報闖入省河慮非其國主所遣

是時有御史奏稱律勞卑帶領
兵船進至黃埔督臣盧坤調派

水師布置嚴密旋即惶恐悔罪請領紅牌出口云云蓋但知其驅逐律勞卑之事而
其時大班來粵實出自督臣所請核之十六年義律至粵粵督奏聞奏中仍理前次
督臣請寄信遣大班來粵之
案是此時之舉逐有因也乃派員押回澳門其十六年繼至者則義律

也義律之來英人初議欲在粵中設立審判衙門專理各洋行交涉
訟事不管貿易蓋欲仍聽散商自行經理然其時各洋行資本首推
英商而義律初至洋行尤謹事之遂以是年冬攜一妻一子來粵名
爲約束商人水手不管貿易實則總攝其事諸番之在粵者咸仰其
鼻息不敢自樹異同十九年薏船之役義律主之時

欽差大臣查來辦粵飭令各洋行將薏船鴉片悉數繳銷首傳義律
不至嗣因各洋行稟覆稽延拘其奸商顛地等義律適自澳門回則
封艙撤去沙文沙文即洋商
買辦見後之令已下不得已始遵飭繳銷而悻悻欲

圖報復之意不已也義律寄信回國仍住澳門是年之秋各洋貨船
來粵者皆遵諭停泊澳洋聽候中國委員查驗義律首發難端凡英
之貨船悉配以兵船聚泊尖沙嘴不聽查驗制府發令驅逐三控其
鋒始駛出老萬山復行文照會索償烟價以爲入粵配茶之需制府
見其跋扈一面照覆責其不守臣節一面奏請停止英人貿易是時
邊釁方起內外諸臣有請閉關封艙前外洋各國一律停止通商
上發交粵督議奏林則徐上言罰不及衆必須示以大公今以英人
不遵法律輒將恭順之各國一例峻拒未免良莠不分設各國稟聞

何辜臣等卽礙難批示且自英人貿易斷後他國頗欣欣向榮蓋逐利者喜彼絀而此羸懷忿者謂此榮而彼辱此中控馭之法正可使其相間相睽輸忱內向若概與之絕轉易聯成一氣昔人所謂彼則聚而協以謀我者不可不預爲之防等因奉

旨如議然是時如彌利堅港脚等國之貨船雖奉准開艙而英人以兵船攔阻口外不得入二十年冬琦善以欽差赴粵方欲議撫許英人照舊通商而義律遽謀先戰後商遂有大角沙角之師粵撫奏稱自用兵以來關課短絀所到洋艘已不及向來十分之二又被英人攔阻泊在港外守候開艙遙遙無期時

上已授貝子奕山爲靖逆將軍隆文楊芳爲參贊大臣飭令到粵先查明各國情形果否怨恨英人阻撓生計抑稍有缺望於

天朝未能招徠撫綏以致向隅失業據實陳奏等因蓋

上意在懷柔遠人更欲使疆臣體察外情如其怨恨有因卽可加意招徠供我指臂此近交遠攻之計也然其時各洋人以阻梗牽留輒思各帶兵船與之講論而義律餌以甘言謂撫事已有成議因之各洋人急欲開艙反爲英人作說客而大府不悟也二十一年二月英人闖入虎門攻破烏涌卡座時則港外之彌利堅佛郎西及港脚等國貨船共四十餘艘銜尾而進於是彌利堅佛人首請開艙復陳明義律悔罪不敢別有要求但求與各國一體通商無不同聲欣感參贊楊芳據以入奏奉

嚴旨切責而義律果不受撫遂有四月闖入省河之役當義律之請撫也一索烟價一欲得香港馬頭琦相以事關割地佯許之而未敢

入奏然英人自謀奪濠鏡不得屢思於附近粵東省城乞一島一地以爲定居蓋早有窺香港志矣迨聞相國許其入奏始則稱兵以要之繼則請繳還浙之定海及獻出二角礮臺以易之相國方欲請旨定奪而英人已在香港出示起造房屋馬頭視爲已有未幾將軍叅贊至粵遂以六百萬及香港一島爲城下之盟而義律之狡焉以逞遂於粵東始終之詩曰誰生厲階至今爲梗則公司之再設也粵東罷兵義律遂回英國不復來其稱兵於閩浙江蘇以要通商之各海口者曰濮鼎查曰郭士利連兵二載擾及三省由海入江而白門之撫議再起二十二年秋英人泊下關將攻江寧欽使制府聯銜請撫首定五口通商之約五口者粵之廣州閩之福州廈門浙之寧波江蘇之上海也初英人以粵東關稅之重屢請在浙開船然其本

意亦祇欲在舟山建立馬頭運貨至寧波不敢遽希腹內地也二十二年英將伯麥占踞定海卽欲在定海通商時浙撫劉韻珂方蒞任臚陳八弊請

飭諭粵東欽差大臣計出萬全慎重妥辦必不可准英人在定海通

商然自粵東再犯已踞定海爲老巢遂將城垣拆毀建造洋樓綿亘

數里挈眷居住

見浙撫致白門三帥函中

自謂足償其夙願不復他求一旦逞志犯

江挾兵要撫遂萌得步進步之念况得寧波而踞之則定海一香港也上海則吳淞爲之屏障築海塘高岸以蔽之一旦入寶山之郭扼黃浦之口浸浸乎堂奧矣閩港之請

上以福州關係省會飭換令給泉州而濮馬等

馬卽馬利遜見後

堅持前約三

帥不敢與之爭遂定議當粵東初開船時定制洋商換貨之後請領

牌回至澳門住冬不得逗留在省挈眷寄居亦不得於城內設立貨棧及洋商擅自入城迨白門之役濮馬等意在弛禁遂於約內載明五口通商准設正副領事官管理貿易皆得挈眷居住又海口賃屋買地以及起造禮拜堂醫院墳塋之類悉聽其便領事官遇有相商事件隨時往來悉聽入城與地方官衙署相見大府但以通商二字完案不復援挈眷入城之舊檔例禁與之詰難自此五口通行悉與澳門香港無異矣是役也彌利堅人不與佛郎西亦後至焉續聞通商事定相國者英任兩廣總督赴粵陳請遂悉援英人例許之惟俄羅斯者舊制在黑龍江設立恰克圖但許其在陸路通市不准由海道入粵迨五口禁開遂以二十七八年間闌入粵東及江蘇之吳淞口雖疊經督院查明駁回而陽奉陰違率附英彌海船出沒於五口間關吏不敢詰此白門議撫通商之大略也

方英人之要撫於粵也粵之紳民獨忌之適賂款事定英兵登岸出北門過蕭關三元里鄉民聚眾創之義律幾不免詳後踰年白門議款時粵民方興團練之局與英人爲不共之仇聞其條約內有領事官相商事件得於地方衙署相見以爲將破昔年入城之禁益洶洶不可止踰年夏濮鼎查至粵先期通刺制府期以入城相見粵人聯名阻之濮遂去其後屢請入城不許二十九年己酉英舟闖入省河挾兵請入城粵人集團練爲制府聲援英之公使文翰知眾怒不可犯乃請罷入城之約復開艙通市如初咸豐六年英人以白門前約所定稅則一款原議百中取五近年貨值漸減稅額不符擬請重定並欲援白門前約得與制府相商署中時葉相國名琛任兩廣總督

旋奉

旨授爲欽差大臣粵人乃持其二十九年之約而爭之維時英人在粵方以中國執其舟子起釁於是公使水師提督及領事巴夏禮等挾兵以要我是年九月英師攻城不克遂襲沿河礮臺粵民憤甚乃悉毀城外十三洋行英人不勝乃歸告國主請調派兵船別遣重使至粵並約法蘭西爲助七年英公使額羅金來粵西八月報作埃爾謹蓋譯音之轉也首請更定貿易條款兩致書制相不省是時各洋皆以夏秋間至粵於是英人以所請不行轉相號召遂起合從之師十二月英法進兵攻粵城陷之執制相繫舟中歸之於國八年四國遣兵由上海徑赴天津遂有是年四月大沽之役以上俱詳後卷既罷兵俄彌二國復以撫事請奉

旨飭大學士桂良吏部尚書花沙納馳赴天津查辦久之不決而英人挾兵要盟擅擬天津新議凡五十六款趣請換約奏聞

上謂稅則之款必須親歷海口相度地宜爰降旨飭四國使臣前詣上海仍命桂良等馳驛同往是年八月欽使及四使臣先後到滬於是英人持其所定天津新議中凡交涉通商事務者定爲稅則善後條約將近年出口入口之貨仍照百中取五按時值估計載明納稅定數議十年一修改時直洋藥上稅定每百觔納海口稅三十兩欽使等復與三國議立專條載入滬約第五款與天津新議之第九款二十八款無涉見後卷中議定桂相奏請令該三國赴都換約遂有九年不遵原議闖入大沽之役英師旣敗惟彌人以恭順准其換約而歸然並天津新議亦中寢矣時西人以天津新議業已奏准遂刊入西

人通書中此天津再議通商之略也

十年英人以換約不果又懲大沽水師之創歸募潮勇將由天津登岸內犯京師夏六月英法連兵入寇天津僧王格林沁帥兵禦於大沽口七月初五日西兵自北塘後路襲我大沽北岸之礮臺初七日遂陷天津僧王退守通州西兵由河西務張家灣一帶進襲通州王執英酋巴夏禮縶之京師八月初七日西兵自通州入寇都統勝保率禁兵禦於齊化門外我師敗績越日

上啓蹕狩於灤陽恭親王奕訢奉

旨留守京師二十二日西兵襲海淀恭王退駐彰義門外四十里西兵直薄安定門聲言攻城駐京王大臣等請釋巴夏禮議撫入西許諾二十九日大開安定門館西酋於國子監天主堂等處尋奉

行在硃諭飭恭王入城速定和議遂於九月十一二十二二十七等日與英法俄三國先後交換和約英則巴夏禮主之於天津新議五十六款外增入九條法俄亦有續增之款又於前索通商各海口增入天津淡水等處其稅則專款定自滬中者曰通商善後條約凡十款內載各國進口出口之貨皆有一定稅則議以十年一修改以上各議均奉

上諭頒行各省督撫大吏一體按照辦理英法乃罷兵退駐天津此續議通商及天津前議得旨允行之張本也

撫事既成英人欲逞志各省以專通商之利尋據英酋卜魯士照會換約之王大臣內稱八年所定條約內載奉天即牛庄海口等處皆准通商欲派領事官前往駐紮並稱第十款所載長江一帶擬於九江漢

口兩處先行開商請咨湖北江西各大吏一體查照遵辦各等因於是恭王奕訢等奏請籌辦通商善後章程並請設立總理各國事務衙門及欽派各口通商大臣十二月初一日奉

上諭京師設立總理各國通商事務衙門著即派恭親王奕訢大學士桂良戶部左侍郎文祥管理並命禮部頒給欽命總理各國通商事務關防應設司員即於內閣部院軍機處各司員章京內滿漢各挑取八員即作爲定額輪班辦事侍郎銜候補京堂崇厚著作爲辦理三口通商大臣駐紮天津管理牛庄天津登州三口通商事務會同各該將軍督撫府尹辦理並頒給辦理三口通商大臣關防其廣州福州廈門寧波上海及內江三口並潮州瓊州臺灣淡水各口通商事務著署理欽差大臣江蘇巡撫薛煥辦理新立口岸牛庄一口

仍歸山海關監督經管外其餘登州各口著各該督撫會同崇厚薛煥派員經理所有各國照會及一切通商事務宜隨時奏繳並將原照會一並呈覽一面咨行禮部轉咨總理衙門查照其吉林黑龍江中外邊界事件並著該將軍等據實奏報一面知照禮部轉咨總理衙門不准稍有隱飾欽此按此皆據王大臣等奏定章程六條內開各事宜照議允准尋據恭王等又酌定新設衙門章程十條具奏奉旨均著照所擬行欽此此京師新設總理各國事務衙門及各口設立通商大臣之檔案也

以上所輯前半據海國圖志所采粵中舊檔參以西人所撰華英通商事略自十九年邊衅以後則皆得之聞見者蓋自康熙開海禁以來二百年互市之消長變遷令人不可思議於是論者皆謂

中西之衅自燒烟啓之今載攷前後乃知衅端之原於互市而非起於鴉片也夫互市者實中西交爭之利而關胥牙儉必欲專之外洋因利而得害乃思以善貽中國而陰收其利善夫范蔚宗之言曰匈奴貪尙關市嗜漢財物漢亦通關市不絕以中之此盛世柔遠之術知者知務之言中之云者中其求利之欲耳梯航萬里遠涉風濤得利則欣失利則戚人情之常何足爲怪一自貪吏侵漁奸商措克彼以求利而來終於失利而返能無怨謗之沸騰邪明之倭禍始於中官繼以商儉終於豪貴於是外番之怨日深而中國亦官民交困矣

國初海禁旣開設關有四江浙閩粵無不可通乃未幾而粵東海關專其利藪未幾而十三洋行操其利權稅有定則未幾而益以規

費支銷名目未幾而益以歸公充餉名目始則取之在吏繼則取之在官如據澳門月報言洋行抽用定例不得過三分今據嘉慶年間大班稟控之詞言棉花一石價值八兩向例行用二錢四分連稅銀不過四錢

據此則初定稅則每兩不過二分爲百中取二

其後每石行用加至二錢

幾十倍之矣又言茶葉稅餉二兩五錢之外洋行會館每石抽費六員至九員不等計茶葉出口之價不過二四倍於八兩一石之棉花而稅用兩行已虧折其十之三則增設名目之漸也洋商不堪其悉索則控於地方官地方官不能平其訟則越控於大府大府不欲窮其獄乃回訴於本國於是帶兵船講論而干戈之衅以起書曰若顛木之有由蘖語曰物必自腐也而後蟲生焉由是言之即使鴉片不入中國亦未能保外洋之終於安靖而隱忍也且

鴉片之來亦爲貨物之虧折起見耳貨物不得其利乃思取違禁之物以補償之若使稅用不增逋欠可得彼又何樂乎以違禁之烟土而予關吏以把持啖水師之賄賂哉竊謂當日欲與之申明烟禁必先取中西互市之全局通盤打算平其百貨之稅則行用更擇其膏脣之尤者而懲之必使番人憬然於生計之羸絀不在鴉片之有無但使關稅行用之積蠹漸除則湖絲茶黃之轉輸自便此爲中外一體威福並行制敵撫敵之策似無踰於此者不清其源而圖塞其流一旦決隄潰防而莫之遏雖籍十七省商民廢著之貲不足以填其無厭之壑有識者觀於鴉片之流毒中土未嘗不扼腕長歎以爲其戎首興於關市其厲階梗於封疆則甚矣漏卮之失輕而養癰之患大也問者曰中西之釁起於互市然則

閉關之議可行乎曰此懲羹吹虀因噎廢食之見也夫中國無所資於外洋而外洋實有資於中國茶黃之屬是也以其爲祛瘴不可少之物故中國以此全其民命卽以此制其死生但使關市持平蠻夷嚮化則其趨之也如慕羶其甘之也如食甚又何取乎閉關折符而絕之哉林文忠奏覆曾望顏一摺不欲停止外洋貿易而不知其請停英人貿易亦自失之何者當日英人負固我之聲罪致討固已師出有名不值詰及其瑣屑之貿易而明禁之况違抗封艙歷有成案當其聚泊尖沙嘴不聽查驗計惟有羈其船隻不准入口而嚴兵以守虎門內外礮臺絕其兵船窺伺之念似毋庸以請停貿易預形之章奏示諭中俾得有所藉口至於定海之陷及大角之役逆情顯著彼其貨船在外遽肯深試於不測之淵

此又禁之毋庸禁者唯事機之失實失於粵東之自撤藩衛耳若增兵戍守無懈可乘則彼之攻擊不遂固已自絕於

天朝卽招之使來其貨船亦必不敢入然後大張曉諭許恭順之各洋先後進口開艙斯時若被英人攔阻在其素所役屬之港脚雙鷹等國或不能不仰其鼻息而勁敵如法郎西彌利堅者豈肯甘心失利有喙三尺而不帶兵船與之講論哉據花旗呈請通商詞內謂貨船入口正可藉以制服西兵此正以毒攻毒之機會惜其時虎門已失無可把握若使防衛依然祇須嚴守內洋大張通商之諭則制西兵者卽在西人彼英人豈能梗阻以自速其寇讐邪英人求戰不得開艙無期仍必由法彌二國爲之講解又豈敢索煙價索香港以肆吠聲邪予謂文忠燒煙之舉未免操之過蹙而

海口之防範亦以此煞費苦心况其時守虎門則關天培守沙角則陳連升父子皆一時之梟將若海口之藩衛不撤卽極其鬼蜮之伎不過棄疾於閩浙間而如粵東者固已搯其吭而拊其背矣又豈能翻然翱翔以縱橫於海上邪然則琦相不來文忠得以一人一手次第經理始終其事則大局未始不可挽也

粵中撫事之局賂欸六百萬名爲道交商欠實則按十九年燒煙之價如數以償仍令出具永不售賣甘結此外尙無包藏禍心之事至於壬寅以後中西交爭一波未平一波又起皆自白門之條約啓之如約內五口通商不將天津山東等處申之厲禁載入約中識者已知其必有異日得隴望蜀之求至於番人不准入城及城內不得設立棧房約內既不提及中間突敘入領事官有相商

事件得與地方官衙署相見一條遂爲後來入粵入閩口實卒釀成咸豐七年攻踞粵城之變又如粵東已給商虧六百萬江甯議和不聞劃抵突又增入軍費一千二百萬遂啓後來天津新議索軍費二百萬續又於京師換約增索六百萬其援案五口通商定約者惟英人一國至二十五年耆相在粵始增給法彌二國通商條約一如英人之式遂啓四國連兵及十年以後大西洋各小國紛紛陳請之效尤予頻年奉差赴滬見西門外洋樓綿亘一如滬中而自粵氛擾東南淮鹽滯銷該洋人則自長江駕一火輪船拖帶鹽艘往來任意甚至潛赴吳城饒州一帶前年有至省之鹽船予奉委會同首縣駁回所過關卡不聽查驗而鹽法壞矣銀之漏卮耗於鴉片近則各通商口岸罕有以貨易貨者故洋商置買貨物亦復銀洋互用中外流

通惟中國自行鈔行大錢之後私鑄既多官板日少而洋船自海道往來購辦銅運並中國制錢亦捆載出洋而園法壞矣至於茶絲兩項之出口足與鴉片之入口相抵是則中國之地利盡於外洋而得其一坏之士馴至商民人等竭其終歲之操作不足以償閭室之一燈今日銀荒恐數十年後百貨俱荒悉入外洋壟斷之藪蓋利之所在不奪不饜故太史公讀孟子而以利爲亂之始孫子謂知者之慮必雜於利害誠有見於古今大勢以利始者未有不以善終嗚呼可不鑒諸

中西紀事卷之四

其地水漲四鼓其地... 江上蹇叟

漏卮本末

亞細亞洲之西南洋有五印度者即西漢之所謂身毒東漢之所謂

天竺也古音天鐵因切與身本同韻此為譯音之對音五印度總名西南洋一名印度海其南印

度有孟買者為入東南洋之咽喉而東中兩印度在其北中印度古

名温都斯坦以興都哥士山為界興都即印度之對音也踰山則西北兩印度地

今回部之國在焉

國朝乾隆二十年英吉利滅東印度之孟加刺遂以次侵并東中南

三印度之地東南兩印度皆產鴉片烟土其出自孟加刺者曰公班

今所稱大土也出自孟買者曰白皮今所稱小土也英人初踞其地

但以為藥材之產而歲收其稅其後流行入中國吸食漸多銷數日暢於是印度人之操其業者無不爭種大小土以為生涯名曰波畢英之稅餉歲增至一千數百萬其初至關口亦照藥材上稅每箱納稅銀三兩自沿海居民爭傳其法展轉效尤不數十年遂流行於各省乾隆之末粵督始聞於朝嘉慶初奉

詔申立嚴禁裁其稅額自此入口之鴉片率暗中偷售而其價益增其初泊於澳門繼乃移之黃埔皆於貨物交易之時夾帶私售道光元年因查出葉恒澍夾帶鴉片之案奉

旨重申前禁凡洋艘至粵先由行商出具所進黃埔貨船並無鴉片甘結方准開艙驗貨其行商容隱經事後查出者加等治罪鴉片躉船盡徙之零丁洋其地水路四達凡福建江浙天津之泛外海者就

地交兌其銷數之暢如故也二年復奉

廷寄交大學士兩廣總督阮元密查奏請暫事羈縻徐圖禁絕而其時鴉片躉船已改泊急水門金星門等處勾結內地奸民往來傳送包買則有窩口說合則有行商私受土規則有關汛為之奧援包攬運載則有快蟹艇資其護送於是躉船之來每歲驟增至數萬箱洋商易貨無多輒載銀出洋回國內地銀荒日甚一日

朝廷憂之十六年太常寺卿許乃濟上言近日鴉片之禁愈嚴而食者愈多幾徧天下蓋法令者胥役棍徒之所藉以為利法愈峻則胥役之賄賂愈豐棍徒之計謀愈巧臣愚以為棍徒之畏法不如其鴛利且逞其鬼蜮伎倆則法令亦有時而窮究之食鴉片者率皆浮惰無志不足輕重之輩亦有逾者艾而食之者不盡促人壽命海內生

齒日繁斷無減耗戶口之虞而歲竭中國之脂膏則不可不早爲之計閉關不可徒法不行計惟仍用舊制照藥材納稅但祇准以貨易貨不得用銀購買應將紋銀番洋一體嚴禁偷漏又官員士子兵丁不得漫無區別犯者應請立加斥革其罪名該管上司及統轄各官有知而故縱者仍分別查議似此變通辨理庶足以杜漏卮而裕國計云云時奉旨交疆臣會議而一時九卿臺諫之列謂其有傷政體於是內閣學士兼禮部侍郎朱燾奏請申嚴鴉片例禁給事中許球謂弛鴉片之禁既不禁其售賣又豈能禁人之吸食若祇禁官與兵而官與兵皆從士民中出又何以預爲之地况明知爲毒人之物而聽其流行復徵其稅課堂堂

天朝無此政體臣愚以爲與其紛更法制盡撤藩籬曷若謹守舊章嚴行整頓自古制敵之法詳內而略外先治已而後治人必先嚴定治罪條例將販賣之奸民說合之行商包買之窰口護送之蟹艇賄縱之兵役嚴密查拏盡法懲治而後內地庶可肅清若其坐地洋人先擇其分住各洋著名奸猾者原奏皆有姓名今節去查拏拘守告以定例勒令具限使寄泊零丁洋金星門之躉船盡行回國並令寄信該國王鴉片流毒內地戕害民生

天朝已將內地販賣奸民從重究治所有坐地各洋人念係外洋不忍加誅如鴉片躉船不至再入中國卽行寬釋仍准照常互市倘仍前私販潛來勾誘定將坐地洋人正法一面停止互市似此理直氣壯該洋人不敢存輕視之心庶無所施其伎倆云云又另片奏陳澳

門近日情形請嚴治漢奸等因奉

上諭鴉片烟來自外洋流毒內地例禁綦嚴近日言者不一或請量
為變通或請仍嚴例禁必須體察情形通盤籌畫行之久遠無弊方
為妥善著鄧廷楨等將摺內所奏如販賣之奸民說合之行商包買
之窩口護送之蟹艇賄縱之兵丁嚴密查拏各情節悉心妥議力塞
弊源據實具奏至許球另片所稱澳人情形是否實有其事著一并
議奏欽此

此兼朱閣學原奏一并給發閱看其朱奏未之見也

是時鴉片弛禁之議已不行疆臣奏

覆率請

定販賣吸食罪名越二年遂有

欽派重臣赴粵查辦之事

十八年鴻臚寺卿黃爵滋奏請將鴉片從嚴懲辦以塞漏卮意在嚴
吸食之罪名定保甲之連坐奉

旨交各省督撫會議並飭部臣重定新例凡吸食者皆以死論時江
蘇巡撫林則徐方內召入都奉

頒給欽差大臣關防令馳赴粵東會同兩廣總督鄧廷楨查辦以是
年冬月

陸辭十九年正月二十五日到省維時省中嚴拏販煙吸烟之犯坐
地洋人不敢包匿於是外來躉船悉寄旋零丁洋面共二十二艘聞
有欽差到省將欲開行欽使欲窮治其事爰咨會虎門水師提督及
碣石鎮總兵統帶提鎮各營分路把守傳令在洋躉船先將鴉片悉
數繳銷方准開艙二月初四日欽使制府坐堂皇傳集十三洋行發
交諭帖令傳諭各洋公司人等並稟較其煙土存儲之實數飭令即

時稟覆時義律先知其事託以回澳門住冬不至各洋行觀望推諉遷延不覆大府趣之急義律始乘舟來省仍僵臥西館如弗聞者適有奸商顛地等乘間脫逃大府怒命拘治之遂援照違抗封艙之案移咨粵海關監督將各洋船住泊黃埔之貨物一律封閉停其貿易又撤其沙文而羈禁之沙文者漢人之受雇於洋館充其買辦者也供應既窘消息不通躉船之在外者經兵役防守斷其岸上之接濟餉道垂絕義律乃中悔之謀於各商查明洋面躉船上所存之煙土據實呈繳計二萬二千八十三箱飭即駛赴虎門聽候收繳是月二十七日欽差大臣會同制府前詣虎門一面咨會提鎮各統帶各標兵船分排口門內外海關監督駐稅口專事稽查於是前泊零丁洋外船之二十二艘先後駛至虎門詳細驗收核數得實事竣復傳集

外洋各商令出具永不售賣烟土在事後犯者人即正法貨船入官等因切結據以奏聞奉

旨所繳鴉片烟土飭即在虎門外銷毀完案是役也先期出示令外洋人來虎門集視以宣

國威其時觀者如堵悉愕伏無異詞且有敘入外洋新聞紙中以紀其事者惟躉船一朝失利不無怨望而義律以總攝大班恥見挫辱遂以此鼓動羣番教唆國主於是燒烟之衅成而索逋之師起矣初鴉片以藥材入中土歲不過數百箱乾嘉之際吸食漸多則數千箱至道光之初則近萬矣據西人所記印度公簿上每年出入之數十二三年間有二萬三千六百餘箱十六七年間多至二萬四千箱是十九年所燒之烟已得其一年之銷數英商自稱破費一千二百

餘萬圓卽彌利堅人核其成本亦在六百萬各洋貿易遂以此爲大宗而英吉利則稅餉之所自出國與民俱病之義律自念非力破此局不足以雪國恥裕庫藏又念非合從於外洋不足以樹黨援通聲氣於是先將各躉船繳銷之煙土按照一千二百萬賠償據彌人所稱六百萬加以運費規費及所得利息皆在其中故倍之以結人心皆寫立會單付各躉船回至英國倫敦英之庫中交兌諸番莫不欣感又遣人徧告孟加刺怵以生計之失印度之民无不兇懼時英吉利國王謀於上下兩議院上院大臣下院紳士僉以爲此項貿易本于中國之例禁其曲在我遂有律士丹衙門遞稟求禁並請禁印度人栽種波畢又地爾洼人時在倫敦作鴉片烟罪過論以爲既壞中國人之風俗又使中國人猜忌英人反礙通商之局英國王聞而是之然自燒烟之信傳入外洋茶絲兩項日見翔踊銀鋪利息

長至六分義律遂以爲鴉片興衰實於國計民生兩有關係國王惑

焉粵東欽使自銷毀鴉片之後兩次照會該國王始則囑之以威繼

則懷之以德而英人但貪其利不計其害也文忠一次照會英國王之書未見然據澳門月報言其留

必外國事務觀其知會英國王第一封書足見其學識長進之效驗是當日未嘗不加意懷柔以冀鴉音之戢也英之重鎮在於東印

度之孟加刺其地合官兵士兵凡二十萬又徵其鴉片之稅以充軍

實印度之民苦其悉索而未嘗不利其懋遷於是白人黑人更番應

募不足則求援於佛郎西彌利堅者素不善英所爲謂既在中國貿

易卽宜遵守中國律令鴉片本非教法中所有予以繳銷正與外洋

違禁之物罰其貨之三倍入公之例相符故英人之計不行而佛郎

西觀望年餘始遣兵船來至香港卒爲靖逆所聞遂託以居間講款

爲詞其事亦寢當十九年躉船之役欽差大臣林則徐奉

命授兩廣總督是年夏秋之交各洋艘先後來粵制府先期傳諭洋行通事人等令其停泊澳門洋面待查明船內並無夾帶鴉片一斤者方准進口開艙各洋唯唯如命惟英之義律首先違抗不聽查驗遂有該國吐密嘩論兵船二隻來粵攔阻遵結之貨船不令進口於是示以兵威一挫之於九龍山再轟之於穿鼻洋三逐之於尖沙嘴見咨會各墨經敗竄乃駛出老萬山踰年義律復行文照會以索償烟價為名制府回文責其不守臣節據英入在定海遞書內言二月間遣使暫討煙價數十萬入粵東配茶天朝大節即申奏天朝請提神兵猛將殺盡爾國片甲無存等語蓋此回覆外洋之詞不嫌俚俗也遂據以奏聞一面請

旨停其貿易維時英人聞封港之令輒將貨物載回本埠轉以鴉片換入粵洋悉由內地奸民漁船蟹艇分路傳送粵中因有貨去烟來之謠制府乃調撥師船沿海搜捕船烟並獲一日數起義律見一切奸計皆不得行於是有狡焉思逞之志又見粵東自燒烟以後海口嚴密無間可乘而閩浙之師起矣

二十年冬欽差大臣琦善入粵議撫義律首索十九年燒烟之價相國許之而義律又欲索香港全島以為貿易來往市埠相國不答遂有沙角大角之師踰年

上命靖逆將軍奕山至粵統兵會剿時相國已受嚴譴撫議方息而義律以乘勝之師預為先發之制遂破虎門闖入烏涌卡座稱兵於省河夏四月英人攻城急城外四方礮臺陷軍民重足股票廣州府知府余葆純言於將軍參贊曰彼以索烟價來必得當而後去此未可以空言撫也皆聘貽无以應次日砲子直穿入

老城貢院前將軍以下皆皇遽失色謀於制撫制撫請先遣廣州府
緹城出見義律而探之義律曰二萬餘箱之烟若固局中人耳盍按
價而稽之蓋十九年燒煙之役余葆純實隨欽使查辦故義律以此
聞執其口也維時彌利堅人深以各躉船收回煙價不應向義律索
加倍之償因余葆純固請裁減乃勸義律援照成本按原索之一千
二百萬減半償之遂罷兵是役也靖逆以通賄班師有傷

國體遂作爲追交商欠完案然洋人無厭之求已留異日再索之張
本而義律亦自此去矣二十二年秋濮鼎查馬利遜等稱兵要撫於
白門遂索賂款二千一百萬首列煙價六百萬補足一千二百萬之
原數也次列商欠三百萬以粵東原議不及商欠一欸也至於戰費
一千二百萬則自入粵後欲償其失而取盈者也維時靖逆遠在粵

東既不與聞彌利堅人亦無至者遂一任濮馬等予取予求不汝瑕
疵其議欸悉出自英使手定三帥受成而已當粵東議撫尙能令各
洋出具永不售賣鴉片甘結今白門以五處馬頭二千一百萬之鉅
欸不曾買得濮鼎查一句恭順語自此法窮財盡漏卮之數不可收
拾於是鴉片弛禁之議復起

方五口之通商也外洋出入之貨多定以稅則載入條議中惟鴉片
以新例初頒弊端遂啓因之三帥掩耳盜鈴既不敢申明前禁又未
便擅定稅章遂置此欸於不議於是各洋歷年進口之貨反以此不
入稅者爲大宗而吸販之徒不禁張瞻明目以趨幕羶之市舊例洋
商以貨易貨不准交易紋銀自茶絲弛禁通行乃有番洋入中國者
又自五口通商外洋獨專鴉片之利乃有易貨不敷補給外洋紋銀

者近則洋商定議專收元寶帶回本國更易番洋漏卮之弊莫此爲甚英人自五口通市以來印度鴉片之稅歲增至八千餘萬

見西人新聞紙中

則中國進口之銷數可想也審販居奇關胥中飽國課支絀軍餉浩繁乃於咸豐五六年間東南各省奏請抽釐以充軍餉始自江蘇之

上海定以每箱二十四兩以二十兩歸入軍需支撥四兩作爲辦公

經費其後江右粵匪由杉關竄入閩界閩督奏請援照江蘇從權辦

理復以軍餉緊迫向洋商貸銀五十萬兩以扣稅歸款

此見外洋月報官領事官出示

云旋又經興泉永道出示定以每箱四十員外加費八員浙之靈波

有本地審戶與洋商往來議定箱價願赴官包繳每月釐金其他若

江西之河口安徽之屯溪皆以此爲釐金大宗藉以接濟軍餉然其

侵漁偷漏爲不少矣八年冬有人奏請定鴉片稅則歸入各關口一

體征收經王大臣會同戶部議奏渾名曰洋藥以昔年本照藥材上

稅也議內言洋藥一項除係官員兵丁太監人等照例治罪又私售

藏奸聚集者照聚賭例治罪外其餘民人概准買用凡外洋及內地

客商在各省關口貿易者均應酌定稅則上海一口議定每百觔稅

銀三十兩

據西人以箱計每箱一百二十斤粵東燒烟案內稱日久晒乾亦約在百斤以外皆總其大率耳

所有各海口及

天津關均係一水可通再內江河面凡船隻能到各稅關口者均請

照上海一律輪稅至崇文門及各省由旱路轉運者均請每百斤減

稅十兩作爲脚費一切緝私章程照各稅關口定例辦理各府州縣

不准再爲影射私征其各關稅口毋庸另立條款以歸簡易其各省

關口於所征此項稅課不必歸入各關歲額報部自接到部文之日

爲始三個月將所征稅銀兩簿一面報部一面起解交庫不准奏留

撥充用項其民間買用於九年三月初一日出示曉諭一月以後悉照新定條例一體遵行等因奉

硃批依議欽此此鴉片廢興之本末也

自上稅後別詳第十八卷

附錄黃侍郎喬滋請塞漏卮原奏

為請嚴塞漏卮以培國本事竊見近年銀價遞增每銀一兩易制錢一千六百有零非耗銀於內地實漏銀於外洋也蓋自鴉片流入中國道光三年以前每歲漏銀數百萬兩其初不過純袴子弟習為浮靡嗣後上自官府摺紳下至工商優隸以及婦女僧尼道士隨在吸食粵省奸商勾通兵弁用扒龍快蟹等船運銀出洋運烟入口故自道光三年至十一年歲漏銀一千七八百萬兩十一年至十四年歲漏銀二千餘萬兩十四年至今漸漏至三千萬兩

之多福建浙江山東天津各海口合之亦數千萬兩以中土有用之財填海外無窮之壑易此害人之物漸成病國之憂日復一日年復一年臣不知伊於胡底各省州縣地丁錢糧徵錢為多及辦奏銷以錢易銀前此多有贏餘今則無不賠贖各省鹽商賣鹽俱係錢文交課盡歸銀兩昔之爭為利藪者今則視為畏途若再三數年間銀價愈貴奏銷如何能辦稅課如何能清設有不測之用又如何能支今天下皆知漏卮在鴉片所以塞之之法亦紛紛講求而實未知其所以禁也夫耗銀之多由於販烟之盛販烟之盛由於食烟之眾無吸食自無興販無興販則外洋之烟自不來矣今欲加重罪名必先重治吸食臣請皇上准給一年期限戒烟雖至大之癮未有不能斷絕一年以後

仍然吸食是不奉法之亂民寘之重刑無不平允查舊例吸食鴉片者罪僅枷杖其不指出與販者罪止杖一百徒三年然俱係活罪斷癮之苦甚於枷杖與徒故不肯斷絕若罪以死論是臨刑之慘急苦於斷癮之苟延臣知其情願斷癮而死於家必不願受刑而死於市況哉

皇上雷霆之威赫然震怒雖愚頑之沈溺既久自足以發聾振聵在諭旨初降之時總以嚴切爲要

皇上之旨嚴則奉法之吏肅奉法之吏肅則犯法之人畏一年之內尙未用刑十已戒其八九已食者竟藉

國法以保餘生未食者亦因烟戒以全身命此皇上止辟之大權卽好生之盛德也伏請

飭諭各督撫嚴飭府州縣清查保甲預先曉諭居民定於一年後取具五家互結仍有犯者准令舉發給予優獎倘有容隱一經查出本犯照新例處死外互結之人照例治罪通都大邑往來客商責成店鋪如有容留食烟之人照窩藏匪類治罪現任文武大小各官如有逾限吸食者照常人加等其子孫不准考試官親幕友家丁除本犯治罪外本管官嚴加議處各省滿漢營兵照地方官保甲辦理管轄失察之人照地方官辦理庶幾軍民一體上下肅清漏卮可塞銀價不致再昂然後講求理財之方誠天下萬世臣民之福也臣爲民生

國計起見謹據實以聞謹奏

附錄林文忠公十九年粵東繳銷鴉片原奏

爲英吉利等國洋人震懾

天威將薨船鴉片盡數呈繳現於虎門海口會同驗收恭摺奏祈
聖鑒事竊照鴉片烟來自外洋流毒中國滋蔓既久幾於莫可挽回
幸蒙我

皇上渙號大宣

乾綱獨斷力除錮弊法在必行且荷

特頒欽差大臣關防派臣林則徐來粵查辦顧茲重大之任慮非闇
昧所勝仰賴

諭旨嚴明

德威震遠不獨禁令行於內地且使風聲播及重洋復蒙

諭令臣鄧廷楨等益矢奮勤盡泯畛域下懷欽感倍思并力驅除在

臣林則徐未到之先已將審口烟販及吸烟各犯拏獲數百起分
別懲辦又派令水師船輪流守堵水陸交嚴東路洋船及在省奸
民後先驅逐節經奏蒙

聖鑒臣林則徐於正月二十五日到省已將會同籌辦大概情形先
行具奏在案維時在洋薨船二十二號已經陸續開行作爲欲歸
之勢若但逐回洋界卽爲了事原屬不難惟臣等密計熟思竊以
此次

特遣查辦務在永杜其源不敢僅顧目前因循塞責查洋人情性本
屬詭譎而販賣鴉片者更爲奸猾之徒此次聞有欽差到省料知
必將該洋船發令驅逐故先開動退至向來所泊之洋面以明其
不敢違抗其實每船內儲存鴉片聞俱不下千箱因上年以來各

海口處處嚴防難於發賣而其奸謀詭計仍思乘間覓售非但不肯帶回本國即使驅逐於萬山之外不過暫避一時而不久復來終非了局內地匪船亦難保不潛赴外洋勾結售賣必須將其躉船鴉片銷除淨盡乃爲杜絕病根但洪濤巨浪之中未能都有把握因思躉船之存儲雖在大洋而販賣之奸商多在省館雖不必遽繩以法要不可不諭以理而懾以威臣林則徐旋譯諭帖責令衆洋人將躉船所有烟土盡行繳銷許以奏懇

大皇帝天恩免治既往之罪並酌請

賞犒以獎其悔懼之心嗣後不許再將鴉片帶回內地犯者照

天朝新例治罪貨物入官等語與臣鄧廷楨怡良酌商卽於二月初四日公同坐堂傳訊洋商將諭帖發給令其齎赴洋船帶同通事

以西語解譯曉諭令其卽日稟復一面密派兵役暗設防備查外洋各國自公司設局以後每年派有四等職官常川守住洋行專司其事維時臣等傳諭之後各國洋人皆觀望於英人而英人則又推諉義律另有通曉漢語之洋人義瞻等四名經司道暨廣州府傳至公所面爲曉諭義瞻等呈稟尙屬恭順當卽賞給紅綢一疋黃酒二罇著令開導各國洋人速繳鴉片未據卽行稟復至二月初十日義律由澳門進省其時奸商顛地等希圖乘間脫逃經臣等查明截回諭責義律以不能約束之罪並照歷屆洋人違抗卽行封艙之案移咨粵海關監督臣豫莖將住泊黃埔之貨物卽行封艙停其貿易又洋館之買辦工人每爲洋人暗遞消息亦令暫行羈禁並將前派暗防之兵役酌量加添凡遠近要隘之區俱

令嚴爲防守不許洋人往來仍密諭弁兵不得輕率肇衅在臣等以靜制動意在不惡而嚴而該洋人懷德畏威固已不寒而慄自嚴密防守之後省城洋館及黃埔澳門與洋面躉船信息絕不相通該洋人等疑慮驚惶自言愧悔臣林則徐又復迭加示諭勸戒兼施即於二十三日據實稟復情願呈繳鴉片維時距羈禁買辦之期業已五日洋船食物漸形窘迫臣等當即賞給牲畜等物二百四十件復向查取鴉片確數經義律向各洋人反復推究始據呈明共有二萬二千八十三箱查向來擊獲鴉片各外洋原來之箱每箱計土四十包每包計三斤每箱計重一百二十斤日久曬乾亦約在百斤以外以現在報繳銷數核之不下二百數十萬斤臣等猶恐所報尙有不實不盡訪之在洋水師及商賈人等僉稱

外洋高大躉船每船所儲亦不越千箱之數是躉船二十二隻核與所報銷數不甚懸殊即諭令駛赴虎門以憑收繳除商明臣怡良在省彈壓防範外臣林則徐臣鄧廷楨俱於二月二十七日自省乘舟二十八日同抵虎門水師提督臣關天培本在虎門駐紮凡防堵洋船查拏私售之事皆先與臣等隨時商榷務合機宜自天收繳之諭旣頒尤須嚴密防範前躉船二十二隻陸續駛赴虎門以外臣關天培當即督飭將弁領帶各營兵船分排虎門內外聲威極壯粵臣豫望亦駐虎門稅口照料稽查當飭候補知府署南雄直隸州海關監督知州余葆純等分派大小文武員弁隨收隨驗隨運隨儲惟爲數甚多所載之箱即須數十隻剝船始敷盤運而自虎門運至內地堆儲之處又隔數十里若日期過速草率收

繳又恐別滋弊端臣鄧廷楨收至三日後先回省臣林則徐自當
常住海口會同提臣詳細驗收經理一切容俟收繳後查明實在
箱數與該洋人所報是否相符再行恭摺奏報並取具洋人永不
夾帶切結存案以杜其復萌偷售之心惟該洋人販賣鴉片多年
本干

天朝法紀若照例內所載化外人有犯並依律科斷之語卽予以正
法亦屬罪有應得惟念從前該洋人遠隔重洋未及周知今既遵
例全繳卽與自首無異合無仰懇

天恩免追既往嚴禁將來並求

俯念各洋人鴉片起空無資買貨酌量

加賞茶葉凡洋人於下繳出鴉片一箱酌賞茶葉五斤藉以獎其恭

順之心而堅其悔過自新之念如蒙

恩准所需茶葉十餘萬斤應由臣等捐辦不敢開銷至洋人呈繳鴉
片如此之多事屬創始自應派委文武大員將原箱解京驗明再
行銷毀以昭實在是否有當臣等謹會同具奏并錄諭洋人原稿
及洋人稟二件恭呈

御覽謹奏

按鴉片之入中國二百餘年

鴉片之名見李時珍本草綱目是明代已入中國矣

當其初外洋不

聞居之以爲利中國不聞防之以爲害以其爲藥餌之需也自乾
嘉之際用之有具吸之有癮展轉數年遂徧天下外洋利其銷數
之暢則種者日蕃販者日夥故鴉片之入中國實中國人自貽之
毒也夫物之毒人無逾於鴉而無日不流行於市肆間自非遇仇

非自盡未聞有受鴉之毒者左傳言晏安鴉毒晏安之利則莊子所謂衽席之上飲食之而比之於十殺一人之畏塗者是則利人之物苟不得其節戕生伐命無異於飲鴆而強死然則人非自取其毒物焉得毒之哉卽以外洋論印度之種鴉片者家爭其利而吸食之禁未嘗不嚴據其月報所記歷年銷數入中國者率居其十之九其流行於外洋者不過黑人及交留巴等國而已開西洋取以鴉片誘之吸食而後乘其羸憊而取之故日本安南等國皆不與西洋人通市也外洋不自吸而以其所害者貽中國中國之關吏洋牙貪其私稅抽分之利而忘其害故當繳銷鴉片之時非獨外洋人以爲不便中國之奸民亦攘臂而欲爭之西人之言曰若想印度人不栽波畢除非中國人不食鴉片是則中國之害雖自外洋貽之而外洋之利實自中國啓之且英人

自聞燒烟之信舉國皇皇皆以爲此非正經貿易其曲在我因請其國主先禁栽種若乘此機會照會該國詢其關稅行用如何擾累爲之酌量裁減則義律先入之言未易得而中之林制使查辦此案計其到粵未及十日發令太早歲事過速轉令善後事宜益形竭蹶漢甬錯之勸孝景削七國也曰削之則反速而禍小不削則反遲而禍大制使當日燒烟之舉毋乃類是故請罪奏中謂發之於此時與發之於異日其輕重當必有辨然洋人惟利是趨度非有不軌之逞而以今日承平旣久水師廢弛彼強我弱苟非迫於其勢之不可遏毋寧沈幾觀變以徐視吾力之所能爲甚無取乎持之急而發之暴也且法必先於內而後及於外今使發令之始擬斬則必斬擬絞則必絞吸者先嚴於官幕販者先治其牙窻

內地之禁既嚴則外來之烟自滯然後仿鹽法之減價敵私平其
百貨之稅則行用以示通商之利在此而不在彼如是數年然後
與之申明烟禁有不羈首係頸而就銜繼乎即使其不便於大利
之坐失而別尋他釁則其事亦必在數年之後各省防範皆如粵
東則反遲者又安見其禍大今昔之形固未可同日語也

限又設而論大帥趙官曰歐歐之畏世不願其表中國
所願者為國之實事也惟小國也曰哈之國又而願小不情
實案情其既與米其十日發令太早誠事感感神合善於事官益
果欲之而量其難而難於人之言未長而中之以林林而查辦
其國主其禁禁其乘出辦會辦會辦其開辦其開辦其開辦
自國禁之其禁國皇皇皆以欲其非玉其其其曲其其其曲

中西紀事卷之五

江上蹇叟

英人英窺邊請撫

道光二十年兩廣總督林則徐奏請停止英商貿易既得旨允行遂
下封港之令維時英人貨船尚在老萬山遷延不去制府調派師船
自廣州至於澳門悉令封禁大小河口嚴密防範又懸賞購募漁船
蟹戶有能出洋燒毀洋船擊斃西兵者除資給軍裝兵械口糧外仍
飭地方官查明家屬以時周恤之時英之貨船雖望風遠徙而護送
鴉片之兵船往來偵探輒被師船搜捕人烟前獲其計遂不得逞是
年之夏傳聞英吉利兵船遠颺並未回國率開向東北行裕制府亟
行文咨會閩浙江蘇等省以為該國兵船業已陸續潛來內地雖疊

經粵省驅逐而護送鴉片隨處誘買均在意中若由深水大洋揚帆直向北駛現值南風司令之際不可不加意嚴防等因時調任閩浙總督鄧廷楨偵知英師將取道窺廈門預募水勇在洋巡緝乘其不備而攻之四月英舟方泊於南澳島之西北水勇瞭見旋裝扮商船漸駛漸近乃以火攻夾擊其大船之首尾傷其船上水手人等數十名英師初以為海盜據海國圖志載其月報事在庚子四月二十二日西人初見以為商船後因放槍疑為海賊核其年月正在廈門被創前其先後過者仍駛赴廈門遣人遞書以求通貿易為請制府不答先調派水勇師船迎擊廈門口外不克遂乘夜將各船收回港內復載大礮二百餘轟擊英人入口之船連敗之英師既遁仍乘舟北駛行至浙洋偵舟山之無備也遂入焉定海額設總兵一鎮守舟山舟山四面環海無險可守六月初二日瞭見在洋船隻游奕於山

之前面初以為賈船不備也初四日南風正發其洋艘分為二幫一

向西行

此即義律赴天津之船蓋義律時未至定海也

一北入定海計火輪兵船大小共二十

六艘時定海總兵張朝發議親督水師出洋又派調中軍游擊羅建功護左營游擊王萬年等分路堵勦初五日突有洋艘二駛至定海之道頭街定海知縣姚懷祥偕羅建功登舟詰之則手出照會文書

一角脅大令獻城

有傳其書者皆用漢字內稱英國水師統領爵子伯麥陸路統領總兵官布爾利敬啓定海姚縣主知悉現水陸軍師到

此須即將定海所屬各海島堡臺一切投降惟候牛個時辰即行開礮轟擊等語是脅大令獻城之證

大令不答退謀於總兵

張朝發張曰吾領水師知扼海口而已時英人後至之舟業已連檣內進羅建功等以外洋礮火利於水而不利於陸將水陸各兵一半撤至距城一里之半路亭扼要堵守一半撤至城中登陴接應張朝發不可初六日總兵復督水師出洋方至港口有洋人杉板舟一徑

入總兵船上投遞信函

此即聲明粵東燒烟歸咎林鄧與天津所遞之書大略相同見卷四注內

張朝發不受

麾令軍士開礮擊之洋舟乃逸初七日英人大小兵船排列口門內外總兵親統各營兵弁放礮相持英人以飛礮自桅檣上注攻其左右軍各營潰亂兵士之傷亡者無數船亦碎裂沈焉總兵方身先接戰猝被礮轟傷其左股不能軍衆兵搶救登岸送回鎮海於是英舟進泊城下先是總兵出港知縣姚懷祥與典史謀守城之計令四門皆塞以土袋語羅建功曰在外者主戰戰雖敗不得入在內者主守守雖潰不得出蓋欲以致之死地交相厲也及總兵敗羅建功等託以城門重閉不得入亦相繼回鎮海姚懷祥見城內無兵預遣典史前赴村壘招募鄉勇數百人甫至城聞變潰焉初八日漏四下英兵登岸陷城知縣姚懷祥赴北門外投水死典史守獄門不屈被戕死

英人既破定海遂踞城而居之時浙撫烏爾恭額聞信督兵馳抵鎮海至則定海已陷自鎮臣以下皆回而張朝發實以受創傷重臥不能起隨據羅建功等稱其堅執出洋攻勦之見以致兵敗陷城遂奏稱當日各營弁擬請分兵或戰或守衆謀僉同收合尙有一千餘兵可以堅守城池何至猝然被陷其爲悞諫撤守以致喪師失地情罪實屬重大遂奉

嚴旨拏問而張朝發已越日身死時

上方授兩江總督大學士伊里布爲欽差大臣赴浙勦辦尋奉

上諭總兵張朝發當接戰時退縮情形究竟如何該撫所奏未能詳晰著伊里布到浙後提同該員等嚴行訊究務得確情毋稍徇隱欽此伊相到浙因張朝發已死仍據羅建功等供詞分別定擬完案於

是張朝發以受傷捐瀕竟不獲與姚懷祥等同邀
賜卹浙之士民冤之

方英人之致書於總兵也見其不受乃泛舟西行欲自達於浙撫適
過鎮海洋面遇有鄞縣商船至寧波託其代呈商不敢隱投之寧波
府署值浙撫過寧知府鄧廷彩得其書上之書言英國宰相照會

大清國宰相蓋欲浙撫之上聞也浙撫見定海已失逆情顯著不敢
以聞乃却其書仍由寧波府交原帶之商人送還具其顛末附片奏
陳

上亦置不問時烏爾恭額以失守海疆自請嚴議奉

旨革職仍留浙江巡撫之任續因洋船赴天津追論其事奉

上諭烏爾恭額當該洋人前在浙江投遞稟帖欲求轉奏乃於接收

時並不將原書呈奏遽行擲還以致該洋船駛往各處紛紛投訴實
屬昏憤致誤機宜烏爾恭額著伊里布委員解交刑部治罪欽此浙
撫被逮入都奉

旨交大學士軍機大臣會同刑部訊供供稱當日洋人投遞書函已
在攻破定海之後况書係固封其中措詞是否得失未便拆閱自念
守土之官既失城池罪名難追今未克復定海卽爲呈奏原書爲罪
更大是以送還僅於籌辦摺內將退還原書大略情形具奏未經詳
晰聲敘係因彼時防守海口安撫居民日夜籌畫精神昏憤不知請
旨定奪自揣謬妄糊塗辜負

天恩祇求從重治罪等語遂按律擬結然浙撫當日得罪之由實不
因退還原書致啓邊釁况義律分道赴天津已有成見亦不因浙撫

退書始行遠訴蓋其時撫議方興林鄧被譴故復因浙撫之壅於上聞而並論之欲以安反側之心施羈縻之術也是年秋八月英人義律馬利遜等舟泊天津海口時任直隸總督者爲大學士琦善義律乃持英國照會中朝宰相之書遣人詣大沽口上之大意言粵東燒烟之釁起自林鄧二人因及春間索價不與遭其詬逐以致越竟求撫遂入浙港之由又言在浙時曾遞書總兵不受再遞書浙撫亦不受不得已始越天津呈訴之由相國據以奏聞遂力持撫議天津道陸建瀛謂英人尙踞定海逆情顯著而託以請撫爲詞是據邑以要我也請以此時錄奪其舟船而羈係其酋長俾之繳還定海然後徐議之相國不可旋宴其頭目二十餘人皆溫言撫之許以奏乞

大皇帝格外恩施並遣重臣詣粵東平反煙案英人大喜時火輪船先後至者八艘聲稱尙有兵船在後義律見相國假以辭色遂張大其本國之富强及船礮之堅利出入抗行意甚自得相國與之議定遂請入都面陳撫事而中樞力贊成之即奉

頒給欽差大臣關防令琦善馳赴粵東查辦義律既得請遂自天津起旋去行至山東東撫託渾布具犒餼送皆如禮奏曰義律馬利遜等自天津回南過山東內洋接見時甚爲恭順聲稱伊等此來志在乞恩今幸蒙

大皇帝鑒察欽差赴粵東查辦不勝欣感不敢在途滋擾請以來船僅止五隻餘船先抵何處據稱伊初來曾糾約孟雅喇國兵船四十隻

孟雅喇即東印度之孟加刺

以爲後援嗣蒙

恩旨恐該國不知情由誤行侵犯更屬辜負

天恩故由天津起旋後先撥船三隻由天津迅速回南阻止前次兵船等因蓋義律當在天津時出入驕蹇訟言挾制相國以羈縻故深秘之而其入都在

上前亦多造膝語廷臣弗聞也迨東省奏至始知義律之來心懷叵測意謂此行如邀允准即回粵聽候查辦否則糾約之兵船在後即張挂紅旗以圖滋擾危言要挾不悟其奸於是中外皆知相國之衰甚而氣餒矣維時林鄧雖被議而閩督則顏伯燾浙撫則劉韻珂松江提督則陳化成皆持勦議而蘇撫裕謙者方署兩江總督尤持不共戴天之憤欲翦滅此而朝食聞琦相粵東之行不禁拊髀流涕而嘆元老之誤國也時義律南歸過江蘇制府懸重賞購之急乃潛赴

鎮海乘肩輿徑入伊相大營有甯州守備周光璧者厲聲叱之始步而入伊相方奉粵東咨會與義律分庭抗禮諸將莫敢言旋遣家人張喜前赴海上犒師往來不絕於是三軍之士無不解甲而甘寢矣伯參踞定海數月聞撫事定輒聽洋艘四出游奕行至餘姚有土人誘其五桅大船擱淺內灘中獲白一人數名內西婦一人裝飾甚盛有傳其外洋之公主者伊相聞之心檄餘姚縣設供帳委員護送入粵時白人有善繪事者上海知縣苦冕得其所繪彼國朝儀圖以上則英國女主也予親見其圖說女主之增曰博雅那同在朝班序立凡大臣入朝率此一膝以手執女主之手而跪之後見臺灣所進圖說及西人紀載皆與此同是年冬義律回粵適琦相口至粵中尋奉命授兩廣總督於是定海之師緩而粵東之怨以洩義我律此舉蓋兩得之計也初定海告陷之疾置聞

上以邊衅之開燒烟實啓之時粵東奏報拏獲烟犯案至奉
硃批外而斷絕通商並未斷絕內而查獲奸犯亦未能淨盡無非空
言搪塞不但終無實濟反生出許多波瀾思之曷勝憤懣看汝何以
對朕也欽此制使其摺請罪又附片請戴罪赴浙圖勦蓋謂英人所
憾在粵而滋擾乃在於浙以粵省無可乘之隙故窮蹙而思他逞也
原奏維時義律既思以踞定海要天津之求又欲以去林督破粵東
詳後之局自琦相受代粵浙兩省罷兵而義律乃得逞志於粵謬爲先戰
後商之言而相國終不悟也踰年義律見香港不可驟得乃請繳還
定海以易之伊相既得粵中咨會始遣員渡海收復並釋所俘不數
月間而羊城納賂之款遂爲舟山拜賜之師君子是以惜制府之不
用而粵浙之兩敝也

附錄林文忠請戴罪赴浙圖剿片奏

再臣渥受

厚恩天良難昧每念一身之獲咎猶小而
國體之攸關甚大不敢不以見聞所及敬爲我
皇上陳之查此次英人所憾在粵而滋擾乃在於浙雖變動若出於
意外其窮蹙正在於意中蓋英人所不肯灰心者以鴉片煙獲利
之重每歲易紋銀出洋多至數千萬兩若在粵得以興復舊業何
必遠赴浙洋現聞其於定海一帶大張招帖每鴉片土一斤祇賣
洋錢一圓是卽在該國孟阿刺等處所出之區且不敷成本其所
以甘心虧折者或云以給雇資或云以充食用並聞其在洋外各
埠貨船雇兵而來費用之繁日以數萬計礮子火藥亦不能日久

支持窮蹙之形亦可概見又洋人過冬以氈爲煖不著皮衣蓋其素性然也浙省地寒勢必不能忍受現有西信到粵言定海陰溼之氣病死者甚多大抵朔風戒嚴自必舍去舟山揚帆南竄各洋商之在粵省自六月以來貿易爲英人所阻亦各氣忿不平均由該國派來兵船與之講理是英人現有進退維谷之勢能不內怯於心惟其虛憍性成愈窮蹙時愈欲逞其桀驁肆其恫喝再生秘計冀得售其奸如一切皆不得行仍必帖耳俛伏臣前屢次體驗頗悉其情卽此時不值與之海上交鋒而第固守藩籬亦更足使之坐困也夫自古苗民逆命無損於堯舜之教我皇上以堯舜之治治中外如鴉片之爲害甚於洪水猛獸卽堯舜在今日亦不能不爲之驅除

聖人治惡懲奸實爲天下萬世計而天下萬世之人亦斷無有以鴉片爲不必禁者若謂西兵來浙係爲禁烟而起則彼之以鴉片入內地者早已包藏禍心發之於此時與發之於異日其輕重當必有辦臣愚以爲鴉片之流毒內地如癰疽之流毒於人身也癰疽生則以漸而成膿鴉片來則以漸而致寇原屬意計中事若在數十年前查辦其時吸烟者尙少禁令易行猶如未經成膿之疽內毒或可消散今則流毒已久譬如癰疽作痛不得不急爲抉膿而該逆滋擾浙洋卽與潰膿无異然惟膿潰而後果其如法醫治托裏扶元待其膿盡之後自然結痂收口若因腫痛而別求消散萬一毒隨內伏誠恐患在養癰矣溯自查辦鴉片以來幸賴

乾斷嚴明

天威震懾躉船二萬餘箱之呈繳係英酋義律遞稟求收有中西字原本可查並有西紙印封可驗繼而在虎門毀化烟土先期出示准令各洋人觀看維時各洋令來觀者有纂爲數千言以紀其事者大抵謂

天朝法令足以服人心今西書且載文諭外洋盡能傳誦迨後各國來船遵其切結寫明如有夾帶鴉片一斤人卽正法貨船入官亦以中西字爲憑具結之後查驗他國洋船皆已絕無鴉片惟英人不遵法律且肆鴟張是以特奉

諭旨停其貿易未有浙洋之事或尙可以恩施今旣攻陷城池戕害文武逆情顯著中外共聞非惟難許通商自當以威服叛第議者以爲內地船廠非外洋之敵與其曠日持久不若設法羈縻不知英人無厭得一步又進一步若使失威不克卽恐患無已時且他國效尤更爲可慮臣之愚昧務思上崇

國體下懾洋情實不敢稍有游移之見也卽以船廠而論本爲防海必需之物雖一時難以卒辦而爲長久之計亦不可不先事預籌且廣東利在通商自道光元年到今粵海關已征銀三千萬收其利者必思預防其害若前此以關稅十分之一制造廠船則制敵亦可以裕如何至尙形棘手臣節次伏讀

諭旨以稅銀何足計較仰見

聖主內本外末不言有無洵足以昭垂奕禩但粵海關稅旣比五省豐饒則以通洋之銀量爲防洋之用從此制敵必求其利造船必求其堅似經費亦可酌籌卽裨益良非淺鮮臣於洋務辦理不善

正在奏請治罪何敢更獻芻蕘惟苟有裨於

國家雖頂踵捐糜亦復何敢自惜儻蒙

皇上格外天恩寬其一綫或令戴罪前赴浙省隨營効力以贖前愆
臣必當殫竭血誠以圖克復至粵省各處隘口防堵嚴密察看現
在情形該洋人似無可乘之隙堪以仰慰

宸懷謹繕片密陳伏乞

聖鑒訓示謹奏

按文忠此奏正值義律至天津遞書之時

成廟見該洋人紛紛投訴率以燒煙爲詞不能無憾於當日辦理之
過激然是時粵省晏然閩洋報捷正可合三省兵力爲一犄一角
之師而義律之所慮者不在於浙而在於閩粵故必謀去林鄧而

後定海之師可緩尤必先去文忠而後粵東之志可逞也據二十
一年閩督顏伯燾所奏粵東洋務摺內稱上年八月該逆赴天津
投遞呈詞不過藉緩定海之師耳琦善宴其頭目二十餘人嬉笑
怒罵隱忍受辱天津道陸建瀛數請拘留其人令其繳還定海琦
善以爲書生之見云云予詢之當日天津之在事者謂義律以燒
烟積不平形諸怨望至其嬉笑怒罵之語秘密不傳惟見當天津
留宴時英酋箕踞椎髻有舞洋鎗飛刀於坐上者相國爲之動色
是則義律撫事之請非干之也挾之也又裕制使咨會蘇撫文內
言該洋人之注意本在廣東前兩年廣東防守嚴密無計可施遂
攻踞定海而其居心終不能忘情於廣東故又逞其奸計擇可欺
者而欺之遂往赴天津直隸督院處遞詞乞撫並有中堂若赴廣

東我們即可永遠和好之語督院不識兵機不知其性墮其計中毅然以爲已任一到廣東接署部院即將兵船水勇概行撤去甚至責備副將不應在礮臺上施放號礮驚動洋人致令生氣此等謬妄情形可咤可恨云云予謂英人所憾在粵而棄疾於浙者粵堅而浙瑕也兵法攻其瑕則堅者亦瑕觀於天津遼林鄧被議琦相入粵虎門撤防則其視粵也如探囊而取物矣義律本無就撫之心特藉琦相以破粵東之局鏑緘騰而後爲先戰後商之大言以脅之雖欲不瑕烏可得哉

按定海之役浙撫奏參總兵悞諫撤守所謂悞諫者卽羅建功等所供欲撤水師入城以俟登岸防剿者也然當日守兵不多卽陸路亦非水師之長技就使登岸防剿亦未見遽能得手而總兵不

受洋人信函督兵開礮非有心退蕙者可比至其受傷之重回至鎮海據烏撫奏參後奉

旨收禁間卽據寧波府鄞縣知縣舒恭受以張朝發自被礮轟傷後日漸沈重飲食不進醫治無效於七月初五日戌刻身故該縣會同城守都司親往查看實係火毒內攻所致等因

此据浙撫二次片奏

是總兵

受傷身死相距二十餘日爲力戰捐軀毫無疑義若羅建功王萬年等相率潰逃退至鎮海迨奉

旨查辦又值總兵已死無可對質狡供避就未可據爲信讞也至烏中丞在浙不能預防邊患授之以瑕咎無可諉而其不受洋人投遞之書未爲謬妄相國欲徇義律之請遂謂其壅下情於上達耳實則還書之舉尙不失持之以正者歟

